

Jahresbericht 2019

Andrea

Am 15. Februar 2019 händ mir erscht mol im Altersheim Berg di 59. Hauptversammlig durä gfuehrt. Mir händ 2 neui Mitglieder dörfe in Verein ufneh. Nachem feine Gmüesteller mit Schnitzel und Pommes, händ mir nacher nu Ziit gha zum wieder mol so richtig plaudere und üs ustusche.

Martina

Zum diesjährige Fasnachtsumzug hend mir wieder emal d' Jasskarte-Kostüm use gnoh. Bereits am Höck zur Vorbereitig hend einigi Fraue teilgnoh. Und später an der HV hend sich grad no es paar wiiteri zur Teilnahm motiviere loh. Speziell au die Landfraue, wo die Kostüm vor villne Jahre ufwendig gestaltet hend, hend mitgmacht. So sind mir am Schluss 27 Fraue, Chind und Männer gsi, wo zum Motto «Trumpf isch Landfrau» teilgnoh hend. Mir hend Zueschauer mit Jasskarte-Schöggeli, Jasskarte-Sets und kläbende Jasskarte beschenkt. Es isch e Freud gsi, dass so viel vo eu motiviert mitgmacht und gholfe bastle hend. Herzliche Dank!

Petra / Ski – Wandertag Arosa – Lenzerheide

Trotz einigermasse gutete Wettervorhersgae im Bündnerland, händ sich am Morge bi regnerischen Wetter 4 Skifahrerinnä richtig Lenzerheide ufgmacht. D'Wanderinnä händ sich entschlosse, dass sie nöd mitcho wwerdet, will d'Wettervorhersage nöd so optimal sind. Doch di 4 fraue händ Glück gha. Je wiiter si is Bündnerland ufe cho sond, desto meh hät ihnä Sunnä entgege glacht.

So händ diä 4 Skifahrerinnä, devo übrigens 2 vom Bürinnäverein Walde, de Skitag i vollä Züüg gnossä, bevor am spätere Numittag schlechtä Wetter cho isch.

Claudia/ Bäuerinntagung

Ä schöns Schärli Fraue sind am 13. März ad Büürinnetagig uf Schänis greist. Idä schön mit diverse Gwürz dekoriertä Turnhallä, hät Zum Thema „Würzig usem Läbe griffä“ händ Kolumnepaar Schreiber und Schneider usem ihrem Läbe : mein Leben als Paar, brichtet. Sie händ uf ä Humorvolli und luschtigi Art, Episode us ihrem Eheläbe brocht. So au das dä Schrneider gmeint hät, „s'waär wieder mol noch“ oder d'Schreiber Benzin statt Diesel is Auto gfüllt hät. Und au das sie mitenand scho sogenannti „Wir“ Projekt dure füehrt hand.....oder esser gseit welle dureführe händ. Zum dure schnuufe , vor luuter Lachä, hät ä jungi Rock'n'Roll Gruppe vom Linthgebiet äs paar schwungvolli , fätzigi Koreografie vorzeiget. Miteme Schmunzle und de noh amene Gedanke isch so Mängi Fraue wieder hei in Alltag....

Andrea

Am 21. Und 22. März sind 4 Fraue uf Schänis zu dä Schreinerei Alois Jud gfahre- unter dä Aaleitig vom Erwin Schwitter händ si Holz zugschnitte, gschliffä und zäme zimmeret. Äs isch fliissig gschaffet wordä. Diä vier Frauä händ aber nu verstärchig gha vo dä Nadja ihrem Sohn äm Joel. So händ dänn alli 4 Frauä ä Holzliege chönä Hei neh, wo si im Summer händ chönä gnüssä.

Martina

Am 28. März sind 13 Fraue nach Rüti gfare zu de Firma hosberg AG. Nach der Überraschigs-Begrüessig mit Kaffee und Gipfeli hed de Ruben Reinhard üs d' Unternämig präsentiert. Nachhär sind mir in d'Sortier-Halle gange. Die Halle isch volle Eier-Kiste und -Schachtle. In de Mitti steit d'Maschine, wo die velle Eier kontrolliert, sortiert und verpackt. 57'000 Eier pro Stund schafft die Maschine. Und rundum schaffend Arbeiter/inne und luegend, dass alles läuft. Im untere Stock werdend Eier für d'Industrie verarbeitet. En grossi Maschine kann sälber Eier ufschlah, Eigelb und Eiwiss trenne und glichzeitig no kontrolliere, ob Qualität vom einzelne Ei in Ordng isch! Au die Maschine verarbeitet 57'000 Eier pro Stund (sie isch aber grad nid gloffe, wo mir dete gsi sind). Das Flüssig-Ei wird denn no gfilteret, homogenisiert, pasteurisiert und nomal homogenisiert und am Schluss abgefüllt. Es isch sehr interessant gsi und alli Fraue sind beidruckt gsi.

Claudia

Am 24. April sind Rita Ackermann, Martina Rüegg und ds erwachsene Gottemeitli vo de Rita uf Eschebach in Metallwerkraum vo de Oberstufe gfare. Obwohl das Grüppli gar chli gsi isch, hed d' Kursleiterin Sonja Wespe de Workshop duregfüehrt. Nach enere kurze Ifüehrig hend mir agfange: Gable usenandschniide, schliife, Struktur dri hämmere und denn um das Röhrlü hämmere bis de Ring Form agnho hed. Es hed nid alles grad uf Ahieb klappet... Trotzdem hend mir üs denn au an es Löffeli oder de Hinterteil von ere Gable traut... Und wo mir denn so richtig in Fahrt gsi sind, isch de Abig au scho ume gsi!

Petra

Scho fascht mit Bikini Temperaturä händ mir dä Pflanzämärt durä gfüehrt. Wäg dem Bilderbuechwätter händ sicher ä chli weniger Lüüt dä Weg an Pflanzämärt gfundä. Aber diä wo cho sind, händ sich am Stand vo dä Brunegg chönä mit Setzling, Geraniä, Fuchsiä und suscht allerlei für schönä Summerbluemä i deckä. Mir Landfrauä händ sie wiederum im Beizli verwöhnt.

Andrea

Au das Jahr händ mir dörfe uf 14 Frau zähle wo a de Raiffeisen-GV am 10.Mai fliissig mitghulfe händ. Die eine händ bereits am Vortag Tisch und Stüehl greiniget, die andere händ am Friitig bis spat id Nacht fest mitghulfe. Mit Vorbereite, Schöpfe, Serviere und wieder ufrume händ ihr dezue bitreit, dass d'Raiffeisen GV 2019 ohni Problem über d'Bühni gange isch. Danke für eue Isatz won ihr immer wieder leistet und so au mithelfed, dass eusi Kasse wieder ufgfüllt wird.

Claudia

Es isch en schöne und scho fast heisse Tag gsi am Mittwuch, 19. Juni. Fuf Fraue hend de Wäg nach Schmerikon unter ihri Füess gno, 13 sind später mit em Auto nagfare. So sind mir 18 Landfraue und no einigi wiiteri Gäst gsi uf em Sommer-Schiff vom Rickli. Es isch en wunderschöne Abig gsi uf em See und mir sind mit eme grosse Salatbuffet und feine Schnitzeli verwöhnt worde. Rund um sind denn langsam immer meh Gwitter ufzoge und genau wo mir in Schmerikon wieder an Land gange sind, hed de Himmel sini Schleuse g'öffnet... Und d'Heifahrt isch denn wüerkli scho eher ungmüetli gsi in dem Unwätter. Zum Glück hend mir für alli e Fahrplägeheit organisiert ka!

Martina

Am Zistig, 13. August sind sibe Fraue in Hasestrick zum Alpenkino gfare. Gschwind hend wir ünsch es Plätzli bsetzt und gmerkt, dass wir für die coole Rückelehne bereits z'spat sind. Die Erfarene unter ünsch hend bereits Deckene vo dehei mitbracht und die andere hend zum Glück en Woldecki chönne uslehne. Ds Wätter hed insofern mitgspielt, dass es trocken gsi isch und d' Wolke hoch gsi sind. So hend mir die schöni Ussicht chöne gniesse, bevor's idunklet hed. De Film «Wolkenbruch» isch amüsant gsi und hed ünsch immer wieder es luuts Lache entlockt. So hend wir ganz vergässe, dass es uf dene Strohballe gar nid so bequem zum Sitze isch! Lieber hätted mir es Happy-End gseh, statt en Schluss, wo alles offe blibt. Aber es hed de Fraue trotzdem guet gfalle und es sind au scho Idee für es Andersmal ustuscht worde...

Petra

Kiesling Seilerei und Völkturnier händ mir mangels Teilnehmerzahl abseit.

Claudia / Vereinsausflug Bericht von Priska Raymann (Rösli überreichen, verdanken)

Martina

Am Sunntig 15. September isch 125 Johr Chilä St.Gallenkappel gfiiret worde. Nached Gottesdienst idä Chilä hät mer chönä ufem Areal idä Grundwies ,verschiedeni Spiel-Ständ vo de Chappeler Vereinä und Festwirtschaft bsueche. So händ au mir en Stand gha mit Stiefelwerfe. Bsuecher a üsem Stand händ regelrächt dä Plausch gha am Stiefel werfä. Natürli händs nöd eifach chöne vo vornä rüherä. Nei sie händ sich müessä abdrähe und zwüsched dä bei dure müessä werfe. So sind Distanze vo 20cm bis zu 13 meter geworfä wordä. Lüüt händ de Plausch gha und mer hät sich gegesitig agheizt.

Andrea

Am Donnstig, 7. November hend Petra und Martina uf em Pauseplatz in St. Gallenkappel de Primarschüeler und Chindergärtler feini Pausemilch verteilt. Derzue hed's au no Zopf gä, wo de Vorstand bachtet hed. D' Chinde und ihri Lehrer und Lehrerinne schätzend die Aktion und ned jeweils Freud.

Petra

D Landi GV isch am Frietig 4. November under üsere Fitiche gstandä, tifig händ mir a dem Obig die gut 250 Aktionären bedient. Fliessige Helferinnen sind am Numittag zum ierichte und am Obig für Bewirtig im Isatz gstandä. Mir als Verein händ vom Landi-Verwaltigsrot äs grosses Lob dörfä entgäga neh. Das lob möchtet mir eui natürlich wiiter geh und üs bi eui , für eurä Isatz ganz herzlich Dankä säge.

Andrea

Alle Jahre wieder.....so isch das Jahr wieder eimol meh am Samstag flüssig geschnitten, gebündelt, gesteckt und kläbät wordä. So sind mengi Advents- und Tür-Christen, und Christgärtchen entstanden wo mir am Sonntag a Maa und Frau verchauft händ. Alles hämmer nöd furt brocht. Famili Schmucki hät denn für us nu im Hofladä äs paar sachä chönä verchauft. Dankä vielmol. Äs herzliches Dankeschön goht au a alli Fraue wo us Tatchräftig i irgend einerä Form a dem Märzwuchend unterstützt händ.

Martina

Mir sind 18 Fraue gsi, wo am Mittwoch, 5. Dezember uf d' Schwägalp gfare sind. Dete hend mir de Laternliwäg in Agriff gno. D' Laternli hend nid so toll glüchtet, so dass mir froh gsi sind, dass de Mond hell gschune hed. De Wäg isch zwar schön, aber eher kurz und teilwies iisig gsi. Drum sind mir scho bald im Restaurant gässe und hend das feine Raclette mit verschiedene Käse und viel Zutate gnosse. Und sälbverständlich hend mir au viel plauderet mitenand.

Claudia

Dä 3. Und 10. Dezember händ mir grad für Landfrauä reserviert zum Schaffä am Chappelle on Ice. Üsi fraue händ under dä Aleitig vom Tageschef super isatz zeigtet. Vielä Herzlichä Dank. Chappelle On Ice isch wieder rege bsuecht worde und vo Gross und chli geschätzt wordä.

Martina

Mitte Januar hend sich fuf Fraue im Familienzentrum troffe zum Fasnacht bespräche. Gueti Idee und viel Motivation sind da gsi und scho bald isch klar gsi, dass es äppis mit «Landfrau-Chuchi» si söll. Es isch denn wiiter diskutiert worde, bis am Schluss ds Motto «60 Jahre Landfrauen – nicht am TV – heute live» festgleit und d'Ufgabe verteilt gsi sind. In de Zwüschezit sind Schosse gnäht und Irene hed ihres Leiterwägeli supertoll dekoriert. Fuf wiiteri Fraue sind de no dezue gstosse und so hend 10 Landfrau und 3 Chind am Sonntag, 16. Februar am Fasnachtsumzug teilgno. Die zahlriiche Zueschauer sind mit feine selbergemachte süesse und salzige Gebäck beschenkt worde. De einti oder die anderi hend au no müesse Omelette kehren. Alli hend viel Spass und Freud ka.

Petra

Vom Oktober bis März gönd es paar wenigi Landfrauä eimol im Monat, abwechsigswiis uf Oberhelfenschwil oder nach Bad Ragaz go badä. Bi dä Ruth Küng händ sich Frueä amel chönä melde, wenna mitgange sind. S'Badä isch amel ä wohltat gsi und diä paar wenige frauä händs gnossä.

Andrea

Sitt langem händ mir im 2019 wieder ä mol dörfä zum Hochsig gratulierä. Am 24. August sind äs paar Landfrau as Hochsig vo dä Katja Müller - Giger in Walenstadt go spalier stoh. Bi herrlich schönem Wetter händ mir nacher dörfä en feinä, richhaltigä Aperognüssä. Dankä vielmol.

Claudia / Nachwuchs

Au im Jahr 2019 häts im Landfrauäverein Nachwuchs geh. So händ mir dörfä adä Martina Schmucki zu dä Jasmin, adä Cornelia Rüdüsüli zu dä Jarah und dä Patricia Eicher zu dä Livia gratulierä. Mir händ ihnä än Goldigä Taler überreicht. Mir wünsched eui und dä ganzä familie wiiterhin viel freud und schöni Momänt mit äm Familiäzuewachs.

Claudia / Schlusswort

So sind mir jetzt fascht am Änd vo üsem Jahresbricht. A derä stell möchte ich mich bi minä drüü Vorstandsfraue, dä Andrea, dä Martina und dä Petra ganz herzlich bedankä für ihri gleischteti Arbet s'ganz johr dur und natürli für geduld und vilicht au mol d'Nerve wo's brucht händ mit mir. Ohni eui würs nöd goh. Äs brucht jedi im Vorstand . Zäme simmer starch. Dankä vielmol.

Au wettet mir a eui Mitglieder dankä sägä, fürs mitmachä und helfe schaffä a all denä Aläss dur s'ganzi Johr. Ohni euri Unterstützig würs au nöd goh. Merci vielmol.